

## Evening Dogri (NSD) Bulletin 22-12-2024

### आकाशवाणी

खास खबरां .....

- प्रधानमंत्री नरेन्द्र मोदी होर अज्ज कुवैत दे अमीर शेख मेशाल अल-अहमद अल-जबर अल-सबाह हुंदे कन्नैबैठक कीती। बैठक च केई महत्वपूर्ण खेत्तरें च साथ सैहयोग बारे चर्चा कीती गई।
- कुवैत नै प्रधानमंत्री नरेन्द्र मोदी होरें गी अपने सब्बने शा बड्डे सम्मान ऑडर ऑफ मुबारक अल कबीर कन्ने सम्मानत कीता।
- गृहमंत्री अमित शाह होरें त्रिपुरा लेई 6 सौ 68 करोड़ 39 लक्ख रुपे दी 13 परियोजनाएं दा नीह पत्थर रखेआ।
- केन्द्री मंत्री डॉ. मनसुख मांडविया होरें अज्ज सीआरपीएफ ते आईटीबीपी दे जवान कन्नै नमीं दिल्ली च फिट इंडिया संडे ऑन साइकल पैहल च हिस्सा लैता।
- सरकार राष्ट्रीय उपभोक्ता दिवस दे मौके पर “जागो ग्राहक जागो” जागृति ऐप जागृति डैशबोर्ड दी शुरूआत करोग।
- क्रिकेट ख भारती महिला टीम नै बड़ोदरा च पैहले इक दिवसीय मैच वैस्टइंडीज दे सामने 315 रंजें दा लक्ष्य रखेआ।

<><><><><><>

### PM Meeting

प्रधानमंत्री नरेन्द्र मोदी होरें अज्ज कुवैत दे अमीर, शेख मेशाल अल-अहमद अल-जबर अल-सबाह हुंदे कन्नै बैठक कीती। इस मौके उनें केई महत्वपूर्ण खेत्तरें जि'आं दवाइए, आईटी, फिनटैक, ढांचागत विकास ते सुरक्षा दे खेत्तरें च साथ-सैहयोग बारै चर्चा कीती। सोशल मीडिया दी इक पोस्ट च श्री मोदी होरें आखेआ जे भारत ते कुवैत नै अपनी दपक्खी सांझ-भ्याली गी सामरिक स्तर तोहड़ी उबड़ा चुक्केआ ऐ। उनें मेद जाहर कीती जे दौनें मुखें दी दोस्ती औने

आहले समें च होर बधोग ते मजबूत बनोग। दौनें नेताएं, भारत ते कुवैत बशकार निग्गर ऐतिहासिक ते दोस्ताना सरबंधें गी चेतता करदे होई दपक्खी सैहयोग गी होर तगड़ा बनाने दी पूरी वचनबद्धता पक्की कीती। इत्त सरबंधै च उनें दपक्खी सरबंधें दा दर्जा बधाइयै इनें'गी सामरिक सांझ-भ्याली दे स्तर तोहड़ी लेई जाने दी बी सैहमति जताई। प्रधानमंत्री होरें कुवैत च 10 लक्ख शा मते भारती लोकें दा कल्याण जकीनी बनाने लेई अमीर हुंदा धन्नवाद कीता।

<><><><><><>

## PM-Award

कुवैत नै प्रधानमंत्री नरेन्द्र मोदी होरें गी अपने सब्बने शा बड्डे सम्मान ऑडर ऑफ मुबारक अल कबीर कन्नै समानत कीता ऐ। विदेश मंत्रालय नै दस्सेआ जे प्रधानमंत्री होरें गी कुसै देसै आस्सेआ दित्ते गेदा एह 20मां अंतर्राष्ट्रीय सम्मान ऐ। ऑडर ऑफ मुबारक अल कबीर कुवैत दी नाइटहुड उपाधि ऐ। एह सम्मान विदेशी राष्ट्र अध्यक्षें, शासनअध्यक्षें ते विदेशी राजशही परोआर दे मिंबरें गी मित्री दी नशानी दे तौरा पर दित्ता जंदा ऐ। मंत्रालय नै दस्सेआ जे एहदे शा पैहले एह सम्मान दो साबका अमरीकी राष्ट्रपति बिल क्लिंटन ते प्रिंस चार्ल्स जनेह लीडरें गी दित्ता जाई चुके दा ऐ।

<><><><><><>

## PM Chrismis

प्रधानमंत्री नरेन्द्र मोदी होर कल नमीं दिल्ली च क्रिसमस समारोह च हिस्सा लैंगन। इस कार्यक्रम दी मेजबानी भारतीय कैथेलिक विशेष सम्मेलन करोआ करदा ऐ। प्रधानमंत्री होर कार्डिनेट, विशेष ते चर्च दे मुख-मुख सदस्यें कन्नै इसाई समुदाय दे प्रमुख नेताएं कन्नै गल्लबात करगंन। एह पैहली बारी ऐ जिसलै प्रधानमंत्री देसे दे कैथेलिक चर्च दे मुख्यालय च इयै नेह कार्यक्रम च हिस्सा लैंगन।



## VP Charan Singh Award

उपराष्ट्रपति जगदीप धनखड़ होरें आखेआ ऐ जे कृषि ग्राएं—मोहड़ें दे तरक्की बाददे दी रीढ़ दी हड्डी ऐ ते जदूं तोहड़ी ग्राएं दे खाके च तब्दीली नेई औंदी, देश विकसित नेई होई सकदा। अज्ज नमीं दिल्ली च चौधरी चरण सिंह पुरस्कार 2024 जित्तने आहलें कन्नै गल्लकत्थ करदे होई श्री धनखड़ होरें आखेआ जे ग्राएं दी अर्थबवस्था छड़ी उसलै गै अग्गे बधी सकदी ऐ जिसलै करसान ते उंदे परोआर आहले बपार कीमते च बाददा ते कलस्टर आत्मनिर्भर बना'रदे होन। भारत दी आर्थिक स्थिति दा जिक्र करदे होई श्री धनखड़ होरें आखेआ जे भारत मजूदा समें च विश्व दी 5मीं सब्बनें शा बड्डी अर्थबवस्था ऐ ते तौले गै तपान ते जर्मनी गी पिच्छे छोड़ियै त्रीये नम्बरै दी सब्बनें शा बड्डी अर्थबवस्था बनने दी बत्तै पर ऐ।



## HM-Tripura

गृहमंत्री अमित शाह होरें अज्ज त्रिपुरा लेई 668 करोड़ 39 लक्ख रुपें दी 13 परियोजनाएं दा शिलान्यास कीता। धलाई जिले दे मसुराई पारा च इक जनसभा गी संबोधित करदे होई उनें रियासत च पिछली कम्युनिस्ट पार्टी सरकार दी आलोचना कीती जे ओह ब्रू समुदाय गी बसाने दे मुद्दे पर चुप्पी बनाई रक्खदी ऐ। उनें आखेआ जे 2018 च भारतीय जनता पार्टी दे सत्ता च औने दे बाद इस समुदाय दे 40 हजार लोकें गी पुनर्वास कीता गोआ। उनें दस्सेआ जे सरकार नै रियासत दे बक्ख—बक्ख जिलें दे ग्यारह ग्राएं च समाज दे लोकें गी पुनर्वास लेई 9 सौ करोड़ रुपे खर्च कीते। श्री शाह होरें आखेआ जे ब्रू समुदाय दे लोकें गी साफ पीने आहले पानी, बिजली दी आपूर्ति, प्राथमिक शिक्षा ते सेहत सुविधाएं

थमां वंचित होने करी उनेंगी गंभीर दुखें दा सामना करना पेआ। उनें आखेआ जे हुन उनेंगी सब्बै सुविधां उपलब्ध करोआए गे न।

<><><><><><>

## HM Bru

केन्द्रीय गृहमंत्री अमित शाह होरें अज्ज त्रिपुरा दे धलाई जिले च हादूकलारु च स्थित ब्रू जनजातीय लोकें कन्ने मलाटी कीती। ब्रू लोकें कन्ने गल्लबात च गृहमंत्री होरें भरोसा दोआया जे जिनें लोकें कया आयूष्मान भारत कार्ड नेई ऐ उनेंगी तौले गै कार्ड दित्ते जांगन। मंत्री होरें लोकें गी आखेआ जे मुल्खै च सरकारी ते पैनलबद्ध निजी अस्पतालें च इलाज लेई इक परोआर गी हर बरे 5 लक्ख रपे दित्ते जांगन। अमित शाह होरें युवाएं गी कौशल विकास सिखलाई हासन करने ते अपना बपार शुरू करने लेई आखेआ। उनें जीवन च समृद्धि हासल करने लेई नोजवानें गी बेहतर शिक्षा हासल करने दा आग्रह कीता। गृहमंत्री होर त्रिपुरा दी त्रऊं दिनें दी यात्रा पर न।

<><><><><><>

## Sports Minister

खेड्ड मंत्री डॉ. मनसुख मांडविया होरें अज्ज केन्द्र रिजर्व पुलस बल सीआरपीएफ ते भारत तिब्बत यीमा पुलस दे जवानें कन्ने नमीं दिल्ली च फिट इंडिया संडे ऑन साइकल तैहत दे पैहले कार्यक्रम च हिस्सा लैता। मंत्री होरें जवानें कन्ने मेजर ध्यानचंद राष्ट्रीय स्टेडियम च राइसन हाल तगर साइकल चलाई। मीडिया कन्ने गल्ल करदे होई डॉ. मांडविया होरें आखेआ जे प्रधानमंत्री नरेन्द्र मोदी हुंदे आह्वान पर पूरे देश अपने आन गी फिट ते सेहतमंद रखने लेई फिट इंडिया अभियान कन्ने जुड़ा'रदा ऐ। मंत्री होरें मते शा मते लोकें गी इस पैहल च शामिल होने दी अपील कीती ऐ।

<><><><><><>

## Udaan Yatri Cafe

उड़ान भरने आहलें ते हवाई यात्रियें लेई इक बड्डी राहत दे तौर उप्पर नागरिक उड्डयन मंत्रालय नै हवाई अड्डे पर इक खाने-पीने आहले आउटलेट "उदान यात्री कैफे" शुरू करने दी घोशणा कीती ऐ जेहदे कन्ने सस्ती ते उचित दरें उप्पर खाने-पीने ते पानी जनेह बुनियादी जरूरी चीजां उपलब्ध करोआए जा'रदे न। अपनी किस्म दी इस पैहलकदमी गी कोलकाता हवाई अड्डे पर पायलट दे तौर उप्पर शुरू कीता जा'रदा ऐ ते जेकर एह सफल होई जंदी ऐ तां इसदी नकल देशै दे होरनें हवाई अड्डें पर बी कीती जाग, जिंदा प्रबंधन भारत दे हवाई अड्डे प्राधिकरण आस्सेआ कीता जाग। कोलकाता दे नेताजी सुभाष चंद्र बोस अंतर्राष्ट्रीय हवाई अड्डे पर पैहले "उदान यात्री कैफे" शुरू होने कन्ने हवाई यात्रियें गी पानी दी बोतलें, चाय, कॉफी, ते स्नैक्स जनेह जरूरी चीजें दी उचित कीमतें उप्पर उपलब्धता थहोग।



## BJP AAP Delhi

बीजेपी ने आक्खेआ ऐ जे पिच्छले दस सालें थमां दिल्ली च आम आदमी पार्टी सत्ता च ऐ, पर शैहरा दे लोकें दे विकास लेई कम्म नेई कीती। अज्ज नमीं दिल्ली च पार्टी दे मुख्वालया च इक प्रेस कांफ्रेंस गी संबोधित करदे होई पार्टी दे वरिष्ठ नेता ते बिहार दे उप-मुख्यमंत्री सम्राट चौधरी होरें आक्खेआ जे दिल्ली दे लोकें गी पता ऐ जे कुन राष्ट्रीय पूंजी दे विकास लेई कम्म करा'रदा ऐ ते कुन कुन कम्म नेई करा'रदा ऐ। उनें आक्खेआ जे दिल्ली दे साबका मुख्मन्त्री अरविंद केजरीवाल शैहरा च टूटी दी सड़कें ते सीवेज दी समस्यां दे मुद्दे उप्पर चुप न। श्री चौधरी होरें आक्खेआ जे प्रधानमंत्री नरेंद्र मोदी हुंदी अगुवाई च राष्ट्र ते दिल्ली अगें बधी जा'रदी ऐ। उनें आक्खेआ जे दिल्ली दे आम आदमी पार्टी दे नेता उलझन पैदा करा करदे न ते पूर्वांचल दे लोकें गी रोहिंग्या कन्ने जोड़दे न।

श्री चौधरी होरें आक्खेआ जे बीजेपी पूर्वाचल दे लोकें दे विकास लेई लगातार कम्म करा'रदी ऐ।

<><><><><><>

## PM Letter Ashwin

प्रधानमंत्री नरेंद्र मोदी होरें रविचंद्रन अश्विन गी इक भावुक खुल्ला पत्र लिखेआ, जिंदे च क्रिकेट ते राष्ट्र च उंदे अनुकरणीय योगदान लेई उंदा धन्नवाद कीता गेआ। इस प्रतिष्ठित ऑफ स्पिनर नै 18 दिसंबर गी अंतर्राष्ट्रीय क्रिकेट थमां रिटायर होने दी घोशणा कीती ही।

<><><><><><>

## Boder-Gavaskar

गवस्कर ट्राफी दे बिच्च अश्विन हुंदे अचानक रिटायर होने कन्नै दुनिया भर दे क्रिकेट प्रशंसकें गी बड़ा झटका लगी गेआ। पीएम मोदी होरें अपने भावुक पत्र च अश्विन हुंदे रिटायरमेंट दी घोशणा दी तुलना इक 'कैरम बॉल' कन्नै कीती ऐ, ते तमिलनाडु स्पिनर दी उंदी बेजोड़ समर्पण ते रिकार्ड तोड़ प्रदर्शनें दी सराहना कीती ऐ। अश्विन हुंदे 765 अंतर्राष्ट्रीय विकेटें दे सांझे रिकार्ड ते टेस्ट मैचें च सारें शा मते प्लेयर आफ द सीरीज दे पुरस्कारें गी उजागर करदे होई पीएम मोदी होरें गेंदबाजी च उंदे नमें बदलावें ते विपक्ष उप्पर हावी होने दी उंदी क्षमता दी सराहना कीती। उनें याद कीता जे किस चाल्ली क्रिकेट प्रेमी बेसब्री कन्नै उनें पलें दा इंतजार करदे हे जिसलै अश्विन हुंदी कुशल गेंदें कन्नै बल्लेबाजें गी उलझन च पाई दित्ता जाग, जिसदे कन्नै ओह भारत दे सारें शा बड्डे मैच विजेताएं च शामिल होई गे। प्रधानमंत्री होरें अश्विन हुंदी फार्मेटें च अनुकूलनशीलता दी बी सराहना कीती ते टीम लेई इसगी इक अमूल्य संपत्ति करार दित्ता। उनें मजाक च पुच्छेआ जे क्या अश्विन दी इंजीनियरिंग बैकग्राउंड ने इस खेडै च उंदे सावधानीपूर्वक ते रणनीतिक रवैये च योगदान दित्ता ऐ। अपने संदेश च पीएम मोदी होरें अपने 14एं ब'रें दे अंतर्राष्ट्रीय करियर च अश्विन हुंदी उपलब्धिएं बारै गल्ल कीती जिंदे च मैच जित्तने आहले योगदान बी शामिल न

जेहदे कन्नै भारतीय क्रिकेट गी नमीं उंचाइयें तगर पुज्जी गेआ। उनें महत्वपूर्ण पलें च अश्विन हुंदी दिमाग दी मौजूदगी दी सराहना कीती ते मेद जताई जे उंदी तेज क्रिकेट बुद्धि आने आहली पीढियें गी प्रेरित करग।

<><><><><><>

## National Consumer Day

उपभोक्ता मामले सरबंधी मैहकमा राष्ट्रीय उपभोक्ता दिवस 2024 दे मौके पर औंदे मंगलवारें गी जागो ग्राहक जागो ऐप, जागृमि ऐपत ` जागृमि डैशबोर्ड दी शुरूआत करोआग। इनें ऐपें दा मकसद डार्क पैटरन खलाफ आपू कारवाई करने च केन्द्रीय उपभोक्ता संरक्षण प्राधिकरण सीसीपीए दी समर्थ गी बढ़ावा देना ऐ। एहदे अलावा जागो ग्राहक जागो ऐप दा उद्देश्य उपभोक्ताएं दी ऑनलाइन गतिविधिएं दरान यूआरएल दे बारे च महत्वपूर्ण जानकारी प्रदान करना ऐ।

<><><><><><>

## NIA

राष्ट्रीय जांच अजेंसी एनआईए नै प्रतिबंधित आतंकवादी संगठन हिजबुल मुजाहिद्दीन कन्नै सरबंधत 2 लोकें खलाफ आरोप पत्र दाखल कीता ऐ। एह मामला थेआर ते विस्फोटक दी जब्दगी कन्ने जुड़े दा ऐ। आरोपी उल-जहूरउ उस गड्डी डरैवर ते जेहदे थमां विस्फोटक असला ते बरूद बरामद होआ हा ते मुबशर मकबूल मीर इस षड्यंत्र च शामिल हा ते ओह पाकिस्तान आधारित हिजबुल मुजाहिद्दीन दे आकाएं दे संपर्क च हा। 30 जून 2024 गी एह बरामदगी कीती गई। बारामुला दे माछीपोरा इलाके च सुरक्षाबलें इक नाका लाया जित्थुआं एह बरामदगी होइ ही। इस मामले च अगड़ी जांच कीती जा'रदी ऐ।

<><><><><><>

## Suspect Arrested

कश्मीर घाटी दे बांडीपोरा ते बारामूला जिले च चलाए गेदे बक्ख-बक्ख अभियाने च त्रै संदिग्ध जने गी थेहार ते गोले-बरूद सने हिरासतै च लैता गोआ ऐ। थोई दी टकोह्दी खूफिया सूह् दी बिनाह् पर फौज ते जम्मू-कश्मीर पुलस आसेआ बारामूला दे यारबुग च मोटर गड्डिडएं गी चैक करने आस्तै इक सांझी गश्ती चौकी खडेरी गई। इस दरान द'ऊं संदिग्ध जने गी गिरफ्तार कीता गोआ। उंदे कब्जे शा इक पस्तौल, द'ऊं हत्थगोले ते होर दुए थेहार बरामद कीते गे। इससै चाल्ली खूफिया जानकारी पर कार्रवाई करदे होई बांडीपोरा दे चानपोरा च खडेरी गेदी गश्ती चौकी दरान इक संदिग्ध गी हिरासतै च लैता गोआ। ओह्दे कोला इक पस्तौल, इक हत्थगोला ते होर दुए थेहारें दी बरामदगी होई। इस सरबंधै च पुलस नै मामला दर्ज करियै अगडी जांच शुरु करी दित्ती ऐ।

<><><><><><>

## Indian Cricket

महिला क्रिकेट च भारत नै आईसीसी चैंपियनशिप श्रृंखला दे पैहले इक दिवसीय मैच वैस्टइंडीज दे सामने 315 रंजें दा लक्ष्य रखेआ ऐ। पैहले बल्लेबाजी करदे होई भारत नै निर्धारित 50एं ओवरें च 9 विकेटें दे नुकसान उप्पर 314 रंज बनाए। स्मृति मंदाना होरें सब्बने शा मते 91 रंज बनाए जिसलै के हरलीन देओल नै 44 रंज बनाए। इसलै वैस्टइंडीज दी टीम 315 रंजे दे लक्ष्य दा पिच्छा करदे होई बल्लेबाजी करा'रदी ऐ। दूआ इक दिवसीय 24 दिसम्बर ते त्रीआ ते खीरला मैच 27 दिसम्बर गी खेड्डेआ जाग। एह् दवै मैच बडोदरा च गै खेड्डे जांगन।

<><><><><><>

## Women Cricket

क्वालालंपुर इच 19एं ब'रें कोला हेठली बरेसू दियें महिलाएं दा टी20 एशिया कप क्रिकेट दे खताबी मुकाबले च भारत नै बांग्लादेश गी 41 रन्जें कन्नै हराइयै जित्त दर्ज कीती ऐ। 118एं रन्जें दे लक्ष्य दा पिच्छा करदे होई बंग्लादेश दी पूरी टीम 18एं ओवरें ते 3 गेंदें च 76 रन्जें पर आउट होई गई। भारत लेई आयूषी शुक्ला नै 3 जिल्ले के परूनिका सिसोदिया ते सोनम यादव नै 2-2 खड्डारियें गी आउट

कीता। एह्दे शा पैहले बल्लेबाजी करदे होई भारत नै तय 20एं ओवरें च 117 रन्ज बनाए। त्रिशा नै 47 गेंदें च सब्बनें शा मते शानदार 52 रन्जें दा जोगदान दित्ता।

<><><><><><>